

2011 Rhif 1605 (Cy. 186)

BWYD, CYMRU

**Rheoliadau Llestri Cegin Plastig
(Amodau ar Fewnforion o Tsieina)
(Cymru) 2011**

NODYN ESBONIADOL

(Nid yw'r nodyn hwn yn rhan o'r Rheoliadau)

1. Mae'r Rheoliadau hyn yn darparu ar gyfer gweithredu a gorfodi, mewn perthynas â Chymru, Reoliad y Comisiwn (EU) Rhif 284/2011 sy'n nodi amodau penodol a gweithdrefnau manwl ar gyfer mewnfurio llestri cegin plastig polyamid a melamin sy'n tarddu o Weriniaeth Pobl Tsieina a Rhanbarth Gweinyddol Arbennig Hong Kong, Tsieina neu a anfonwyd oddi yno (OJ Rhif L77, 23.3.2011, t.25) ("Rheoliad y Comisiwn").

2. Mae'r Rheoliadau hyn —

- (a) yn gwahardd rhoi ar y farchnad lestri cegin plastig polyamid a melamin o Hong Kong a Tsieina nad ydynt yn cydymffurfio â'r amodau, neu na fuont yn destun y gwiriadau mewnfurio a'r ardystiad a bennir yn Rheoliad y Comisiwn (*rheoliad 3*);
- (b) yn gwneud torri unrhyw waharddiad a bennir yn rheoliad 3 yn dramgwydd (*rheoliad 4*);
- (c) yn dynodi'r awdurdodau cymwys at ddibenion darpariaethau penodol o Reoliad y Comisiwn (*rheoliad 5*);
- (ch) yn darparu mai dyletswydd awdurdodau bwyd lleol yw gweithredu a gorfodi Rheoliad y Comisiwn a hysbysu'r Asiantaeth Safonau Bwyd os yw dadansoddiad labordy o fewnforion llestri plastig yn dynodi anghydymffurfiaeth â'r Rheoliad hwnnw (*rheoliad 6*);
- (d) yn darparu ar gyfer adennill, oddi ar y mewnforyr, y costau a dynnir gan awdurdodau bwyd wrth gyflawni'r rheolaethau swyddogol sy'n ofynnol gan Reoliad y Comisiwn (*rheoliad 7*);

- (dd) yn pennu'r camau sydd i'w cymryd gan awdurdod bwyd pan nad yw llwyth wedi ei anfon ynghyd â'r dogfennau gofynnol, neu pan ganfyddir nad yw'n cydymffurfio rywfodd arall (*rheoliad 8*);
- (e) yn darparu ar gyfer hawl mewnforiwr i apelio yn erbyn penderfyniad gan swyddog awdurdodedig o awdurdod bwyd i gymryd camau o dan reoliad 8 (*rheoliad 9*);
- (f) yn darparu ar gyfer atal dros dro fannau cyflwyno cyntaf dynodedig (*rheoliad 10*); ac
- (ff) yn cymhwyso, gydag addasiadau, ddarpariaethau penodedig o Ddeddf Diogelwch Bwyd 1990 at ddibenion y Rheoliadau hyn a Rheoliad y Comisiwn (*rheoliad 11*).

3. Mae'r Rheoliadau hyn yn gwneud yn ofynnol bod yr Asiantaeth Safonau Bwyd yn adolygu'r modd y'u gweithredu a'u heffaith, ac yn cyhoeddi adroddiad, o fewn 5 mlynedd wedi i'r Rheoliadau ddod i rym, ac o fewn pob 5 mlynedd wedi hynny. Yn dilyn adolygiad, mater i Weinidogion Cymru, ar ôl cael cyngor gan yr Asiantaeth Safonau Bwyd, fydd penderfynu a ddylai'r Rheoliadau barhau mewn grym fel y maent, neu a ddylid eu diwygio neu'u dirymu (*rheoliad 12*). Byddai angen offeryn pellach i ddirymu neu ddiwygio'r Rheoliadau.

4. Paratowyd asesiad effaith rheoleiddiol ynglŷn â chostau a buddion tebygol cydymffurfio â'r Rheoliadau hyn, ac y mae ar gael gan yr Asiantaeth Safonau Bwyd, Llawr 11, Tŷ Southgate, Caerdydd, CF10 1EW.

2011 Rhif 1605 (Cy.186)

BWYD, CYMRU

Rheoliadau Llestri Cegin Plastig (Amodau ar Fewnforion o Tsieina) (Cymru) 2011

Gwnaed 28 Mehefin 2011

*Gosodwyd gerbron Cynulliad Cenedlaethol
Cymru* 30 Mehefin 2011

Yn dod i rym 1 Gorffennaf 2011

Mae Gweinidogion Cymru yn gwneud y Rheoliadau canlynol drwy arfer y pwerau a roddir gan adrannau 16(2), 17(2), 26(1)(a) a (3) a 48(1) o Ddeddf Diogelwch Bwyd 1990(1), ac a freinir bellach ynddynt hwy(2).

I'r graddau na ellir gwneud y Rheoliadau hyn o dan y pwerau yn Neddf Diogelwch Bwyd 1990 a bennir uchod, mae Gweinidogion Cymru yn gwneud y Rheoliadau hyn drwy arfer y pwerau a roddir iddynt gan adran 2(2) o Ddeddf y Cymunedau Ewropeaidd 1972(3).

-
- (1) 1990 p.16, amnewidiwyd adran 1(1) a (2) (diffiniad o "food") gan O.S. 2004/2990. Diwygiwyd adrannau 17 ac 48, yn eu trefn, gan baragraffau 12 ac 21 o Atodlen 5 i Ddeddf Safonau Bwyd 1999 (1999 p.28), "Deddf 1999". Diwygiwyd adran 48 hefyd gan O.S. 2004/2990. Diwygiwyd adran 53(2) gan baragraff 19 o Atodlen 16 i Ddeddf Dadreoleiddio a Chontractio Allan 1994 (1994 p.40), Atodlen 6 i Ddeddf 1999, O.S. 2004/2990 ac O.S. 2004/3279.
- (2) Trosglwyddwyd swyddogaethau a oedd gynt yn arferadwy gan "the Ministers" (sef, o ran Cymru a Lloegr ac yn gweithredu ar y cyd, y Gweinidog Amaethyddiaeth, Pysgodfeydd a Bwyd a'r Ysgrifenyddion Gwladol a oedd yn eu trefn yn ymwneud ag iechyd yn Lloegr a bwyd ac iechyd yng Nghymru) i'r graddau yr oeddent yn arferadwy o ran Cymru, i Gynulliad Cenedlaethol Cymru gan Orchymyn Cynulliad Cenedlaethol Cymru (Trosglwyddo Swyddogaethau) 1999 (O.S. 1999/672) fel y'i darllenir gydag adran 40(3) o Ddeddf 1999 ac wedyn fe'u trosglwyddwyd i Weinidogion Cymru gan baragraff 30 o Atodlen 11 i Ddeddf Llywodraeth Cymru 2006 (2006 p.32).
- (3) 1972 p.68.

Mae Gweinidogion Cymru wedi eu dynodi at ddibenion adran 2(2) o Ddeddf y Cymunedau Ewropeaidd 1972 mewn perthynas â materion sy'n ymwneud â diogelwch bwyd (gan gynnwys diod)(1).

Yn unol ag adran 48(4A) o Ddeddf Diogelwch Bwyd 1990 maent wedi rhoi sylw i gyngor perthnasol a roddwyd gan yr Asiantaeth Safonau Bwyd.

Fel sy'n ofynnol gan Erthygl 9 o Reoliad (EC) Rhif 178/2002 Senedd Ewrop a'r Cyngor sy'n pennu egwyddorion cyffredinol a gofynion cyfraith bwyd, yn sefydlu Awdurdod Diogelwch Bwyd Ewrop ac yn gosod gweithdrefnau o ran materion diogelwch bwyd(2), ymgynghorwyd yn agored a thryloyw â'r cyhoedd wrth baratoi a gwerthuso'r Rheoliadau hyn.

Enwi, cymhwyso a chychwyn

1.—(1) Enw'r Rheoliadau hyn yw Rheoliadau Llestri Cegin Plastig (Amodau ar Fewnforion o Tsieina) (Cymru) 2011.

(2) Mae'r Rheoliadau hyn yn gymwys o ran Cymru ac yn dod i rym ar 1 Gorffennaf 2011.

Dehongli

2.—(1) Yn y Rheoliadau hyn—

ystyr “yr Asiantaeth” (“*the Agency*”) yw'r Asiantaeth Safonau Bwyd;

mae i “awdurdod bwyd” (“*food authority*”) yr ystyr a roddir i “food authority” yn rhinwedd adran 5(1A) o'r Ddeddf;

ystyr “cynnyrch perthnasol” (“*relevant product*”) yw llestri cegin plastig sy'n tarddu o Weriniaeth Pobl Tsieina a Rhanbarth Gweinyddol Arbennig Hong Kong, Tsieina neu a anfonwyd oddi yno;

ystyr “y Ddeddf” (“*the Act*”) yw Deddf Diogelwch Bwyd 1990;

ystyr “Rheoliad y Comisiwn” (“*the Commission Regulation*”) yw Rheoliad y Comisiwn (EU) Rhif

(1) O.S. 2005/1971.

(2) OJ Rhif L31, 1.2.2002, t.1. Diwygiwyd y Rheoliad hwnnw ddiwethaf gan Reoliad (EC) Rhif 596/2009 Senedd Ewrop a'r Cyngor sy'n addasu nifer o offerynnau yn ddarostyngedig i'r weithdrefn y cyfeirir ati yn Erthygl 251 o'r Cytuniad i Benderfyniad y Cyngor 1999/468/EC mewn perthynas â'r weithdrefn reoleiddiol gyda chraffu: Addasiad i'r weithdrefn reoleiddiol gyda chraffu — Rhan Pedwar (OJ Rhif L188, 18.7.2009, t.14).

284/2011 sy'n nodi amodau penodol a gweithdrefnau manwl ar gyfer mewnfurio llestri cegin plastig polyamid a melamin sy'n tarddu o Weriniaeth Pobl Tsieina a Rhanbarth Gweinyddol Arbennig Hong Kong, Tsieina neu a anfonwyd oddi yno(1).

(2) Mae i unrhyw ymadrodd, a ddefnyddir yn y Rheoliadau hyn ac y defnyddir yr ymadrodd Saesneg sy'n cyfateb iddo yn Rheoliad y Comisiwn, yr un ystyr yn y Rheoliadau hyn ag a ddygir gan yr ymadrodd Saesneg cyfatebol yn Rheoliad y Comisiwn; ac y mae unrhyw gyfeiriad at Erthygl â rhif yn gyfeiriad at yr Erthygl sydd â'r rhif hwnnw yn Rheoliad y Comisiwn.

(3) Pan fo unrhyw swyddogaethau o dan y Ddeddf wedi eu priodoli—

- (a) gan orchymyn o dan adran 2 o Ddeddf Iechyd y Cyhoedd (Rheoli Clefydau) 1984 (2), i awdurdod iechyd porthladd; neu
- (b) gan orchymyn o dan adran 6 o Ddeddf Iechyd y Cyhoedd 1936(3), i gyd-fwrdd ar gyfer dosbarth unedig;

rhaidd dehongli unrhyw gyfeiriad yn y Rheoliadau hyn at awdurdod bwyd, i'r graddau y mae'r cyfeiriad yn ymwneud â'r swyddogaethau hynny, fel cyfeiriad at yr awdurdod y priodolwyd y swyddogaethau iddo felly.

Torri amodau ar fewnfurio llestri cegin plastig o Tsieina

3.—(1) Ni chaiff unrhyw berson roi ar y farchnad yng Nghymru unrhyw gynnyrch perthnasol sydd wedi ei fewnfurio i'r Undeb Ewropeaidd ac eithrio drwy gydymffurfio â gofynion Erthygl 3(1), (2) a (3) (amodau mewnfurio).

(2) Ni chaiff unrhyw berson roi ar y farchnad yng Nghymru unrhyw gynnyrch perthnasol hyd nes bo—

- (a) y gwiriadau a bennir ym mharagraff 1(a) ac, yn ôl fel y digwydd, paragraff 1(b) o Erthygl 6 (rheolaethau yn y man cyflwyno cyntaf) wedi eu cwblhau; a
- (b) yr awdurdod bwyd wedi rhoi datganiad yn unol ag Erthygl 3(4), sy'n dynodi bod y cynnyrch perthnasol yn cydymffurfio, ac felly'n dderbyniol i'w ryddhau i gylchredeg yn rhydd.

(1) OJ Rhif L77, 23.3.2011, t.25.

(2) 1984 p.22; amnewidiwyd adran 7(3)(d) gan baragraff 27 o Atodlen 3 i Ddeddf Diogelwch Bwyd 1990.

(3) 1936 p.49; rhaid darllen adran 6 ar y cyd â pharagraff 1 o Atodlen 3 i Ddeddf Diogelwch Bwyd 1990.

Tramgwyddau a chosbau

4. Mae unrhyw berson sy'n peidio â chydymffurfio â pharagraff (1) neu (2) o reoliad 3 yn euog o dramgwydd ac yn agored—

- (a) o'i gollfarnu'n ddiannod, i ddirwy na fydd yn fwy na'r uchafswm statudol; neu
- (b) o'i gollfarnu ar ddiad, i ddirwy.

Awdurdodau cymwys

5.—(1) Yr awdurdod cymwys at ddibenion Erthyglau 3(1) a (4), 4, 6(1), 7 a 9 yw pob awdurdod bwyd o fewn ei ardal neu'i ddsbarth unedig ei hunan.

(2) Yr awdurdod cymwys at ddiben Erthygl 6(2) yw'r Asiantaeth.

Gweithredu a gorfodi

6.—(1) Dyletswydd pob awdurdod bwyd o fewn ei ardal neu'i ddsbarth unedig ei hunan yw gweithredu a gorfodi Rheoliad y Comisiwn a'r Rheoliadau hyn.

(2) Rhaid i bob awdurdod bwyd—

- (a) hysbysu'r Asiantaeth ar unwaith ynghylch canlyniadau unrhyw ddadansoddiad labordy y parodd yr awdurdod ei gynnal o dan Erthygl 6(1) os yw canlyniadau'r dadansoddiad hwnnw'n dynodi anghydymffurfiaeth; a
- (b) rhoi i'r Asiantaeth pa bynnag wybodaeth a chymorth y gofynnir amdanynt gan yr Asiantaeth mewn cysylltiad â gweithredu a gorfodi'r Rheoliadau hyn.

(3) Rhaid i Gomisiwn Cyllid a Thollau Ei Mawrhydi gyflawni'r swyddogaethau a roddir i awdurdodau tollau o dan Erthygl 8.

Treuliau sy'n tarddu o reolaethau swyddogol

7.—(1) Bydd y treuliau a godir yn unol ag Erthygl 27(1) o Reoliad 882/2004, ar fewnforiwr gan awdurdod bwyd mewn cysylltiad â'r gwiriadau a grybwyllir yn Erthygl 6(1), yn daladwy gan y mewnforiwr pan roddir galwad i dalu gan yr awdurdod bwyd mewn ysgrifen.

(2) Pan fo awdurdod bwyd yn canfod anghydymffurfiaeth—

- (a) â gofynion Erthygl 3(1), (2) neu (3) neu Erthygl 4; neu
- (b) yn dilyn y gwiriadau a grybwyllir yn Erthygl 6(1)(b),

bydd y treuliau a godir yn unol ag Erthygl 54(5) o Reoliad 882/2004, ar fewnforiwr gan awdurdod bwyd, yn daladwy gan y mewnforiwr pan roddir

galwad i dalu gan yr awdurdod bwyd mewn ysgrifen.

(3) Ym mharagraffau (1) a (2) ac yn rheoliad 8(3), ystyr “Rheoliad 882/2004” (“*Regulation 882/2004*”) yw Rheoliad (EC) Rhif 882/2004 Senedd Ewrop a’r Cyngor ar reolaethau swyddogol a gyflawnir i sicrhau bod cydymffurfedd â’r gyfraith ynglŷn â bwyd anifeiliaid a bwyd, rheolau iechyd anifeiliaid a rheolau lles anifeiliaid yn cael ei wirhau(1).

Hysbysiadau a gweithredoedd mewn achos o anghydymffurfiaeth

8.—(1) Os yw mewforiwr yn cyflwyno llwyth o gynnyrch perthnasol ar gyfer ei fewnforio i Gymru, a hynny heb gyflwyno datganiad ac adroddiad labordy cysylltiedig yn unol â gofynion Erthygl 3(1), (2) a (3), caiff yr awdurdod bwyd, drwy hysbysiad ysgrifenedig, wneud yn ofynnol bod y mewforiwr yn cyflwyno datganiad o’r fath o fewn 14 diwrnod ar ôl dyddiad cyflwyno’r hysbysiad.

(2) Os yw’r gwiriadau y darperir ar eu cyfer yn Erthygl 6(1) yn dynodi—

- (a) pan fo hysbysiad wedi ei gyflwyno o dan baragraff (1), nad yw’r datganiad a bennir yn Erthygl 3(1) ynghyd â’r adroddiad labordy a bennir yn Erthygl 3(3) wedi ei gyflwyno erbyn y dyddiad a bennir yn yr hysbysiad; neu
- (b) pan nad oes hysbysiad wedi ei gyflwyno o dan baragraff (1), nad yw’r datganiad a bennir yn Erthygl 3(1) ynghyd â’r adroddiad labordy a bennir yn Erthygl 3(3) wedi ei gyflwyno; neu
- (c) bod datganiad neu adroddiad labordy wedi ei gyflwyno nad yw’n cydymffurfio â gofynion Erthygl 3(1), (2) a (3); neu
- (ch) nad yw’r cynnyrch perthnasol sy’n destun y gwiriadau yn bodloni—
 - (i) prawf adnabod, neu
 - (ii) gofynion Rheoliad y Comisiwn (EU) Rhif 10/2011 ar ddeunyddiau ac eitemau plastig y bwriedir iddynt ddod i gysylltiad â bwyd(2),

rhaid i’r awdurdod bwyd gymryd y camau a bennir ym mharagraff (3).

(1) OJ Rhif L165, 30.4.2004, t.1. Pennir y testun diwygiedig mewn cywiriad (OJ Rhif L191, 28.5.2004, t.1). Diwygiwyd y Rheoliad hwn ddiwethaf gan Reoliad y Comisiwn (EU) Rhif 208/2011 sy’n diwygio Atodiad VII i Reoliad (EC) 882/2004 Senedd Ewrop a’r Cyngor a Rheoliadau’r Comisiwn (EC) Rhif 180/2008 ac (EC) Rhif 737/2008 mewn perthynas â rhestr i enwau labordai cyfeirio yn yr UE (OJ Rhif L58, 3.3.2011, t.29).

(2) OJ Rhif L12, 15.1.2011, t.1.

(3) Rhaid i'r awdurdod bwyd, drwy hysbysiad ysgrifenedig—

- (a) gwneud yn ofynnol bod y mewnoforiwr, o fewn 60 diwrnod ar ôl dyddiad cyflwyno'r hysbysiad—
 - (i) yn ail anfon y llwyth, i rywle sydd y tu allan i'r Undeb Ewropeaidd,
 - (ii) yn achos llestri cegin polyamid, eu rhwygo a'u toddi, a ffurfio'r cynnyrch canlyniadol yn eitemau at ddibenion ac eithrio'u rhoi mewn cysylltiad â bwyd, neu
 - (iii) ar gost y mewnoforiwr, dinistrio'r llwyth dan reolaeth swyddogol; a
- (b) hysbysu'r mewnoforiwr y caiff yr awdurdod, yn unol ag Erthygl 54(2) a (5) o Reoliad 882/2004, os na chydymffurfir â gofynion is-baragraff (a), drefnu i ddinistrio'r llwyth ac adennill y costau storio a dinistrio oddi ar y mewnoforiwr.

(4) Ceir cyflwyno unrhyw hysbysiad o dan baragraff (1) neu (3) i'r mewnoforiwr neu i gynrychiolydd y mewnoforiwr.

Hawliau apelio

9.—(1) Caiff unrhyw berson a dramgwyddir gan benderfyniad swyddog awdurdodedig i gyflwyno hysbysiad o dan reoliad 8(3) apelio i lys ynadon.

(2) Y weithdrefn a ddilynir mewn apêl i lys ynadon o dan baragraff (1) yw gwneud cwyn am orchymyn, a bydd Deddf Llysoedd yr Ynadon 1980(1) yn gymwys i'r gweithrediadau.

(3) Y cyfnod a ganiateir ar gyfer dwyn apêl o dan baragraff (1) fydd un mis o'r dyddiad y cyflwynwyd yr hysbysiad i'r person sy'n dymuno apelio, ac at ddibenion y paragraff hwn, ystyrir bod gwneud cwyn am orchymyn yn gyfystyr â dwyn yr apêl.

(4) Os yw llys ynadon, mewn apêl o dan baragraff (1), yn penderfynu bod penderfyniad y swyddog awdurdodedig yn anghywir, rhaid i'r awdurdod roi effaith i benderfyniad y llys.

(5) Caiff person a dramgwyddir gan wrthodiad llys ynadon i ganiatáu apêl a wnaed i'r llys o dan baragraff (1), apelio i Lys y Goron.

(6) Pan fo apêl wedi ei dwyn o dan baragraff (1) o fewn y cyfnod a bennir ym mharagraff (3), atelir effaith hysbysiad a gyflwynir o dan reoliad 8(3) hyd nes penderfynir yr apêl yn derfynol.

(1) 1980 p.43.

Atal dros dro ddynodiad man cyflwyno cyntaf

10.—(1) Pan fo'r Asiantaeth wedi ei bodloni y byddai parhau i weithredu man cyflwyno cyntaf dynodedig o dan Erthygl 5 yn achosi risg ddifrifol i iechyd y cyhoedd, caiff atal dros dro ddynodiad y man cyflwyno cyntaf, yn gyfan gwbl neu'n rhannol, drwy gyflwyno hysbysiad ysgrifenedig i'r perwyl hwnnw, i weithredwr y man cyflwyno.

(2) Pan gyflwynir hysbysiad o dan baragraff (1), bydd y man cyflwyno yn peidio â bod yn fan cyflwyno cyntaf dynodedig o dan Erthygl 5 i'r graddau a bennir felly yn yr hysbysiad hwnnw, hyd nes dynodir ef felly drachefn o dan Erthygl 5.

Cymhwyso amrywiol adrannau o'r Ddeddf

11.—(1) Mae'r darpariaethau canlynol o'r Ddeddf yn gymwys at ddibenion y Rheoliadau hyn gyda'r addasiad bod unrhyw gyfeiriad yn y darpariaethau hynny at y Ddeddf neu unrhyw Ran ohoni i'w ddehongli fel cyfeiriad at y Rheoliadau hyn—

- (a) adran 20 (tramgwyddau o ganlyniad i fai person arall);
- (b) adran 21 (amddiffyniad o ddiwydrwydd dyladwy)(1) gyda'r addasiad—
 - (i) bod is-adrannau (2) i (4) yn gymwys mewn perthynas â thramgwydd o dorri rheoliad 3 fel y maent yn gymwys mewn perthynas â thramgwydd o dan adran 14 neu 15, a
 - (ii) yn is-adran (4), ystyrir bod y cyfeiriadau at "sale" yn cynnwys cyfeiriadau at "placing on the market";
- (c) adran 30(8) (sy'n ymwneud â thystiolaeth ddogfennol);
- (ch) adran 35(1) (cosbi tramgwyddau)(2), i'r graddau y mae'n ymwneud â thramgwyddau o dan adran 33(1) fel y'i cymhwysir gan baragraff (3)(a) uchod;
- (d) adran 35(2) a (3)(3), i'r graddau y mae'n ymwneud â thramgwyddau o dan adran 33(2) fel y'i cymhwysir gan baragraff (3)(b) uchod;
- (dd) adran 36 (tramgwyddau gan gyrff corfforaethol); ac
- (e) adran 36A (tramgwyddau gan bartneriaethau Albanaid)(4).

(1) Diwygiwyd adran 21 gan O.S. 2004/3279.

(2) Diwygiwyd 35(1) gan Ddeddf Cyfiawnder Troseddol 2003 (2003 p.44), Atodlen 26, paragraff 42, o ddyddiad sydd i'w bennu.

(3) Diwygiwyd adran 35(3) gan O.S. 2004/3279.

(4) Mewnosodwyd adran 36A gan Ddeddf Safonau Bwyd 1999 (1999 p.28), Atodlen 5, paragraff 16.

(2) Wrth gymhwyso adran 32 o'r Ddeddf (pwerau mynediad) at ddibenion y Rheoliadau hyn, rhaid dehongli'r cyfeiriadau yn is-adran (1) at y Ddeddf fel pe baent yn cynnwys cyfeiriadau at Reoliad y Comisiwn.

(3) Mae'r darpariaethau canlynol o'r Ddeddf yn gymwys at ddibenion y Rheoliadau hyn gyda'r addasiad bod unrhyw gyfeiriad yn y darpariaethau hynny at y Ddeddf i'w dehongli fel pe baent yn cynnwys cyfeiriad at Reoliad y Comisiwn a'r Rheoliadau hyn—

- (a) adran 33(1) (rhwystro etc. swyddogion);
- (b) adran 33(2), gyda'r addasiad bod y cyfeiriad at "any such requirement as is mentioned in subsection (1)(b) above" i'w ystyried yn gyfeiriad at unrhyw ofyniad o'r math a grybwyllir yn yr is-adran honno fel y'i cymhwysir gan is-baragraff (a) uchod; ac
- (c) adran 44 (amddiffyn swyddogion sy'n gweithredu'n ddidwyll).

(4) Mae adran 34 o'r Ddeddf (terfyn amser ar gyfer erlyniadau) yn gymwys i dramgwyddau o dan reoliad 4 fel y mae'n gymwys i dramgwyddau sy'n gosbadwy o dan adran 35(2) o'r Ddeddf.

Adolygu statudol

12.—(1) Cyn diwedd pob cyfnod adolygu, rhaid i'r Asiantaeth—

- (a) cynnal adolygiad o reoliadau 3 i 11;
- (b) nodi casgliadau'r adolygiad mewn adroddiad; ac
- (c) cyhoeddi'r adroddiad.

(2) Wrth gynnal yr adolygiad, rhaid i'r Asiantaeth, i'r graddau y bo'n rhesymol, roi sylw i'r modd y gweithredir ac y gorfodir Rheoliad y Comisiwn mewn Aelod-wladwriaethau eraill.

(3) Yn benodol, rhaid i'r adroddiad—

- (a) nodi'r amcanion y bwriedir i'r system reoleiddiol a sefydlir gan y Rheoliadau hyn eu cyrraedd;
- (b) asesu i ba raddau y cyrhaeddwyd yr amcanion hynny; ac
- (c) asesu a yw'r amcanion hynny'n parhau'n briodol, ac os felly, i ba raddau y gellid eu cyrraedd gyda system sy'n gosod llai o reoleiddio.

(4) Ystyr "cyfnod adolygu" ("*review period*") yw—

- (a) y cyfnod o 5 mlynedd sy'n cychwyn gyda'r diwrnod y daw'r Rheoliadau hyn i rym; a
- (b) yn ddarostyngedig i baragraff (5), pob cyfnod dilynol o 5 mlynedd.

(5) Os cyhoeddir yr adroddiad o dan y rheoliad hwn cyn diwrnod olaf y cyfnod adolygu y mae'r adroddiad yn ymdrin ag ef, bydd y cyfnod adolygu dilynol yn cychwyn gyda'r diwrnod y cyhoeddir yr adroddiad hwnnw.

Lesley Griffiths

Gweinidog dros Iechyd a Gwasanaethau
Cymdeithasol, un o Weinidogion Cymru

28 Mehefin 2011